



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :



Tir Yimyim



tir_yimyim



tir yimyim

TAPAK 8

Israel den rara anena alitsü
mulunga lir: Naim Qassem

Australia coach McDonald indang
contract atsülangtsüogo



VOL. XXII ISSUE NO. 23 (ADOK 23)

DIMAPUR

ROGONÜ (FRIDAY)

YIMPOKSÜI (NOVEMBER) 01, 2024

₹ 5.00

Election duty senzüba jawan tem reprangtsüla: RPP

Dimapur, Mongputeni/Oct. 31 (TYO): State ngur küm 60 ajungba benjongmung mapang Ex-parliamentarian nem akhum agütsüba kanga junger liasü, aser state sorkar dang tasü tait Jawans tem nema tim akhum agütsütsü ayongzüker, shirnok election duty atema November 2024 nung Jharkhand aser Maharashtra-i yakta aotsü lir, ta Rising People's Party ajanga sangdong ka nung ashi.

2024 Lok Sabha election mapang state sorkar inyakyim akhum maket liasü. Asen Jawan tem linük tesem ajungalen tatsük mapang anibelega jajar aser karbo tatsük agi takum samar

TA/DA ama sen 550 agütsü. NDPP-BJP coalition-i kasa aibelen tanaben meinyaktsüla. State sorkari Jawans tem takum asangsang nung asadangtsüla aser state alema duty aor nem TA/DA ajema agütsüba reprangshitsü ayongzüker, ta RPP ajanga ashi.

Jawan tem shia nem TA/DA ya tajemba agia sen 1000 bo agütsütsüla. Iba ama mapa inyakra Nagaland ya teintet state ka aser asen state aser linük asoshi bendanga agütsür tenzüka Jawan tem asoshi bilema mapa tajung inyaker ta angatetsü, ta RPP sangdong ajanga ashi.

Tongpang Ozüküm-i Phangsang nung PWD Rest House lapoktsü

Mokokchung, 31st Oct (TYO): MLA & Advisor to Water Resources Department, Government of Nagaland, Tongpang Ozüküm-i Oct 31st, 2024 nü Phangsang nung 'PWD Rest House' ka lapoktsüogo. Iba kiji Phangsang Pastor, L. Tochi-i meshitetsü. Iba ki asütsü asoshi Phangsang nung alir Imkongsadang-i kimung angati tenla.

MLA & Advisor, Tongpangi iba ki lapokja jembidang, sarkari nungdakba ki yangera yutsüogo, anungji, ibai tajangzüker akatsüsa nüburtemi timi ketdangsüa pei meyong ama meima amshidaktsünür, ta mepishia metetdaksü.

Tesüiba mapang asen tsüraburtemi Phangsang area renloktü asoshi kanga meranga inyakba otsü tajung lir, saka aji süiren otsü ka dang kümogo, anungji, "joko Phangsang area aintsü asoshi ni anir tanü lenirtem kwika lir, asenok khuret asütsüla", ta ashi. "Tesüiba otsü dang

jembira asenok tejakleni maotsü", ta paisa shisem.

Tanü amai ali tenlara tarutsü nunga terenlok mapa balala bener arua inyaktsü merangtsü, ta paisa ali tenlar Imkongsadang dang pelaba lemsatet.

Phangsang nung Govt. High School tia indang khuret süa lemsatetpang, yangi tazünger melira iba school ya jenjang ajemzüksü kecha temenu maka, anungji, asenok ajak senteper iba school ya wazüka ayutsü aser ibai tejakleni bener aotsü temulung agütsütsü asoshi paisa ajungshia liasü.

Tanü Nagaland nung government school onsara, saka tazünger mali küma aor, iba den tanga district-tem den medemdangra Mokokchung district ya-a tesayur nungdakba dang nungi teimba aliba district rongnung züngsema lir, anungji, tia tamajungbai maitsü asoshi tekümdangtsü olen ka paisa lemsatet.

(Maneni tapak 2 nung...)

India-i ali inch kata magütsütsü: PM Modi

Kachchh, Mongputeni/Oct. 31 (Agencies): Brehostibarnü Ato Kilonser Narendra Modi-i Gujarat kübok Kachchh nung Indo-Pakistan arütsü nung aliba jawan tem nem tenüngsang agütsü, kong pai armed forces den Diwali munga liasü. Parnok saksalema aliba mechi, shingaia iba region tsütsü reprangtsü tasü meitteter, ta pai ashi.

Modi-i Lakki Nala nung aliba Sir Creek area nung BSF, army, navy aser air force personnel den Diwali benjong munga liasü, pai BJP-i aniba central sorkari kodanga India nung ali inch kata magütsütsü, ta ashi.

"Linük indang ali inch kata magütsütsü sorkar iba linük nung lir," ta pai ashi.

Iba yongji Centre indang policy tem ya armed forces den lirumedema yanglur, ta ashi.

"Asenoki asen tsükchir indang o nung metaloka malir, asen linük kumzüksü atema asenoki asen army tashi nung amanger. Alimai nenok angudang, parnoki India indang tashi angur, kodang tsükchir temi nenok angur, parnoki par sentong tamajung nung tatem angur," ta pai ashi.

Ato kilonseri sepaitem dang linük tenzüka ya tia taka aser iba ama mapa ya temela mesü ta metetaka inyaker, ta shi.

"Kodang ni nenok den Diwali amunger, idangji kü tepela tali akumer. Tan Diwali ya khenyongi balaka, kechiaser Lord Ram küm 500 sülen Ayodhya nung pa alidaki meyhaya shilangogo. Nenok mechi India nung aliba nüburtemi pei linük kumzüksü lir ama bilemer," ta pai ashi.

Nüburtem melungjem tashi yimchiyimjung malitsü: TR Zeliang



Nzau village nung October 31, 2024 nü Chaga Gadi Festival (Mini Hornbill festival) amungdang tangokba noksa ka nung Deputy Chief Minister TR Zeliang den dangartem angur.

Dimapur, Mongputeni/Oct. 31 (TYO): Peren district kübok Nzau yimdak October 31, 2024 nü Chaga Gadi Festival (Mini Hornbill festival) sentong Deputy Chief Minister TR Zeliang-i moaja liasü.

Chaga Gadi ya meshitetba aser nüburtet tangatetep aser yimchiyimjung asoshi bendanga agütsüba benjong ka lir, koba Liangmai kin-i alu aruba sülen amunger.

Iba sentong nung tongti tesemdang ama jembidang, sobaliba aser yimsü-yimpong ya tezüluba nung kumzüksü ayutsüla, aji asünung dang lanu putu nem angazükdaksütsü aser teti atema mesamai amshitetsü, ta Dy. CM TR Zeliang-i ashi.

Zeliangrong nüburtet sobaliba khenyongi balaka aser puti otsü tajung lir, aser Zeliangrong nüburtet temi tesem balala nung liaka telungjem

asoshi inyaktsüla, ta pai ayongzüker.

Nüburtem melungjem tashi sobaliba temaba jenjangi ajungkettsü aser yimchiyimjung alitsü tasak asütsü, ta TR Zeliang-i ashi.

Iba benjongmung nung sentong akhumdong ama Minister, Higher Education & Tourism, Temjen Imna Along aser sorkar ketdangsür aser lokti lenir balala dena kanga longsolongbena munga liasü.

Nagaland nung Minimum Initial Service Package semzük

Kohima, Mongputeni/Oct. 31 (TYO): Alimar lendong, tzü mopung melenba, raraba, wara aser emergency balala ajanga alima nung anogoshi nisung 34,000 shi pei ki yutsür tesem balalai prokshia aor, ta FPA India, Nagaland Branch, general manager Vincent Belho-i Brehostibarnü ashi.

Tetsür tem indang reproductive health care nungdakba ya timtem mapang soita meyteter, ta pai Kohima Press Club nung Minimum Initial Service Package (MISP) for Sexual Reproductive Health (SRH) initiative and Family Planning Association of India's (FPA India) indang osangbener den jembidang ashi.

Pai ashiba agi, timtem ajurua alir quarter kabo tetsür arishi küm 15-49 tsüngta lir.

Tetsür pongu nung ka mashisa alitsü aser pongu nung kabo tanur asoba mapang timtem ajurur, ta pai ashi.

Iba ama tensa nungya keraa kibong akumba, tashiyim amshia shi nung medemba, tashiyim amshiba, tanur raksaa indokba, tanur sor mashishi yutsüba, SGBV aser meimlai kibong akumba den HIV densema Sexually Transmitted Infections (STIs) tali akumba lir, ta pai ashi.

Iba nung FPA India ya linük nung SRH tsütsü lokti tentet mezümpur lir aser nüburtet ajunga nem 1949 nungi SRH indang temeden aser osangtsüsang aser services agüja arur, ta

Belho-i ashi.

FPA India yagi family planning, HIV nungi jenbua aliba, maternal health aser adolescent sexual health education densema service balala agütsür, ta pai ashi.

Linük tesem balala nung nüburtet timtem balala ajuruba mapang FPA India ajanga tongti shilem agia arur ta ashi.

Reproductive health atema MISP ajanga alimar lendong, rara aser danga emergency agi kongshir aliba nüburtet nung tongtipang teyari agüja arur, ta pai ashi.

MISP ya alima ajungai meteta aliba inyakyim ka lir, koba ajanga humanitarian crisis mapang 'reproductive health needs' agütsütsüsa yanglua lir.

Iba yagi tanur asoba mapang aser tepok nung lia asüba nungi nokdang, sexual violence ketdang asür aser contraception ama tongtipang services tem agütsür, ta Belho-i ashi.

FPA India ajanga MISP ya emergency response framework nung inoksema tensa tamajung nunga SRH services maneni agütsür, ta ashi.

Timtem mapang SRH services tajungtiba nung agütsütsü mechi FPA India-i local governments, international partners aser NGOs tem den lungjemer inyaka arur, ta pai ashi.

Iba den külemi FPA India ajanga healthcare workers aser CSO Partners nem MISP protocols nung training agütsür, timtem mapang SRH services

ketdangsütsü nüburtet nem tashi agütsür.

India nung tanen makai alimar lendong aser tayongzüker balala ajurur, anungji FPA India ajanga takum kumzüksüba SRH services agütsütsü meranger, ta ashi.

Humanitarian response preparedness nung shilem ka ama Kohima nung aliba Nagaland Branch ajanga training agütsü tenzüko, senden balala aser orientation sentong tem stakeholders balala den ayongzüka agir, aser Mumbai nung aliba Headquarter ajanga training agütsüba nungi onoka angazüker, ta Belho-i ashi.

Kasa mapang Emergency Preparedness Plan (EPP) ya tongtipang lir, kechiaser iba yagi kija, nüburtet aser lokti nem timtem mapang tajungtiba nung telangzüba agütsütsü asoshi renemshitsür, ta FPA India Nagaland Branch Program Officer, Vingosanuo Khatso-ia ashi.

Sentong renema aliba ajanga lendong ajemdaksür, takum kumzüksü, aser alimar lendong, warashira mesüra accidents amala tajemba atalokdaksür.

Nüburtem renema aliba ajanga lendong timtem nungi tekeraba nung nokdakteter aser tarutsü nung lendong ajurutsü aliba nungia kumzüksü, ta lai ashi.

Iba yagi pei sasa pei kumzüksü alitsü atema awareness aser shisatsü agütsür, ta Khatso-i ashi.

Watsü Mungdangi Ayongzüka Südaktsü Asentenshiba sentong ka kaogo



Watsü Mungdangi Ayongzüka Südaktsü Asentenshiba sentong akaba tatemba sentong agir kelen sentong nung adenertem kemi tangokba noksa.

Mokokchung, October/Mongputeni 13(TYO): Watsü Mungdangi Ayongzüka Südaktsü Asentenshiba sentong ka October 17 nungi October 31 tashi Department of Women Resource Development tenungitba nung kanga dang tajangzük ka-a agiogo.

Tetsürtem nem südaktsü tesayuba ya October 17 nungi October 31 tashi Women Resource Centre, Marepkong Ward Mokokchung nung Wt. Rongsenlemla (Ungma) aser Guru, Wt. Punalemla (Mongchen) ajanga parnok 10 nem agüja liasü. Hapta ana(2) tashi agiba mapang nung sü tapu balala koma adaktsü iba tesayuba agüja liasü.

Anogo tokonü(9) iba tesayuba agütsür kelen October 31 nü tatemba sentong ka agi aser iba sentong nung Ao Senden Tir Wb. Marsanen Imsong-i tajungshi o jembidang iba ama

sentong ya tanga sentong dang nungi balaka aser aikati rateta meinyakba aser mapa ka lir, südakba sama-a aoba mapang ka nung yamai inyakba ajanga nungjakoja meteter aser asen tetsü oshi asentenshiba nung shilem tulu agir, nübur ajangzüksü aser ajungketsü asoshi iba ama sentong ayonga akaba asoshi Watsü Mungdang nem tenüngsang agüja ashi.

Aor sobaliba nung aluyimba, olaangla aser yongsen mapaji kanga dang tongtipang lir, alu mayimba ajanga nungjakoja aika sama-a odagi, nungjakoja samabaji ajanga oshi sama-a aor, kasaji olaangla mapa meinyakba aser yongsen mapa meinyakba ajanga asen temeden ayak meilong meilongi sama-a odagi, anungji aluyimba, Olaangla aser yongsen mapa ya inyaksülata Ao Senden Tir-isa ashi.

Paisa tetsürtem shirnokisa angazükogo ibaji ano tangar nema nenok ajanga angazükdaktsüsülata ajungshi, südakba ajanga tajangzük agiteta pei kibong mesüa litettsü asoshi teka agi tmtema adakba yabo jenjang balaka yong ayoktsüla ta ashi.

Iba sentong nung Tsüngremer lenisüba jazüka Wt. Imtinenla ajanga sarasademer sentong tenzük aser iba den tangazüker (trainee) nungi nisung anati(2) jembi, tesayuba agütsür Guru Wt. Punalemla parnoki tayongzükba o jembi, School of Culture, Tayonger Wt. Dr. Adangla Changkiri ajanga training agirtem aser tesayurtem nem certificate achayanga agütsü aser Wt. Arenla Longkumer Watü Mungdang Tir ajanga tepela o jembia liasü.

Tongpang Ozüküm-i Phangsang nung PWD Rest... (TAPAK 1 NUNGI...)

Sangküm 2025 March nungi Phangsang nung tesayur atema ki ana (2) sütsütsü, ta pai metetdaksüogo. Phangsang area renloksü atema inyaka arudar aser ano maneni inyaksü sentong lir, anungji, nüburtem nungi amalitep aser tenungitba nungdaker, ta paisa mepishia ashi.

PMGSY sentong kübok yim o yim sentaktepba lenmang kar yakta tenzüksüba lir, PMGSY ya tanga mapatong ama masü yangibo temenok kecha magütsür, aji oda, ali magütsüra asenok takoksa asütsü, aser iba lenmang ya technology tasen amshia inyaksüba lir, anungji, ali kiburtemi aser yimden

tawabangba nung iba lenmang tajungtiba yanglutettsü asenok ajak khuret südi, ta paisa ayongzük.

Iba rest house ya 2023 June ita asü tenzükba June 2024 nung tembang. Iba mapa ya M/S Alemthy Jr. nem lakh 54 (estimated cost) agüja südaktsü. Iba ki nung taktang 6 lir – VIP taktang 2, tetsür aser tebur atema taktang kaka, kitchen ka, dining aser reception ta lir, ta executive engineer, PWD (H) Mokokchung, Er. Nungsang Jamir-i ki asüba osang lemsatepdang metetdaksü. Iba ki ya tongtibangsa PWD aser tanga dept nungi ketdangsür/

staff-tem duty senzüba mapang anisungzüksü nükjidong nung asüba lir. Iba ki ya public nungdakba nunga amshitettsü akok, ta paisa shisem. Paisa PWD (Housing & Mechanical) Minister, P. Beshangmongba-i bener yokba shiti ka telok dang zünga metetdaksü.

Sentong nung Phangsang Area Telongjem tir, A. Lipok Jamir-i tarurtem pela-a agizük, Phangsang Vice Chairman, Imtizulu aser EAC Sangpangchang Longkumer nadi tepela o tatsütsü lemsatep. Imtiyanger Imsong, S.O. PWD (Housing) Mokokchung iba sentong nung menden liasü.



October 30 nü EBRC Mokokchung village nung Ao Riju ajanga ayongzük School nung Ao tesayurtemi tanurtem dang Ao tajungtiba nung sayua angazükdaktsüsü nükjidong nung shisatokden ka ayonga kaogo. Iba sentong akaba nungtem o Wb. L. Alemtemsü. Ao Area Education Officer-i jembi aser tongti o Wb. I. Temjen Tüzdir Coordinator Ao Reju ajanga jembi aser Rev. Rongsen Chairman Ao Reju Mendenbuba ajanga tajungshi o jembia liasü. Iba sentong nung EBRC Mokokchung village kübok aliba schooltem nungi Ao tesayur 71 dena kanga dang takok ngua agia liasü aser iba sentong temer kelen tangokba noksa nungji angur.

Mkg district nung pensioner tem dang life certificate benoktsü tuyu

Dimapur, Mongputeni/October 31 (TYO): Thangchinkhup-i sangdong ka ajanga metetdaksüogo. Maneni pensioner tem dangsa form/s aser tanga tenüngdakba osangtem Bank of Baroda, Mokokchung Branch nungi agitsü atema kasa sangdong ajanga metetdaksüogo.



October 31 nü Raj Bhavan, Kohima nung Diwali benjung kanga meraketa mungogo, kong Raj Bhavan officer, staff aser parnok kinungertem den Old Minister's Hill Kohima nungi Nepali nungertemi shilem agia liasü. Sentong nung Angh La Ganesan-ia shilem agi aser pai tanüla tajung nung Diwali benjung amungba nükhshia bilemba lemsatepa liasü. Angh-isa, Diwali benjung ya lokti sentong ka ama ayongzük agitettsü, kong tamangba yimsü balala nungi süaka nüburtem adenshia shilem agitettsü, kechiyong iba benjung ya temenen madak takok anguba temaitsü benjung ka lir, ta ashi.

TAFCFPOL-i ayongzük Tuli nung mez-üngbuba Ango Benjongmong mungogo



A. Panjung Jamir

Tuli, Mongputeni/October 31 (TYO): Tuli Area Fishery Cooperative Farmer Producer Organization Ltd. (TAFCFPOL)-i ayongzük mezüngbuba Ango Benjongmong (Fish Festival) takok ngua mungogo.

Iba sentong atema NABARD-i teyari agütsü aser Community Educational Centre Society (CECS), Department of fisheries & Aquatic resources & Nagaland Bio Resource Mission for marketing & packaging nung den longjemer ayongzük liasü.

Iba benjung ajanga ango metsürtem, stakeholder tem, sorkar tenzükertem aser lokti longjemdaksüogo aser sentong agiba mapang local ango produce tem sayaba den sustainable fish farming ajungketogo aser iba tesem nung rongsenketzüng terenlok kadaktsüogo.

Sentong nung sobaliba saya balala sayaba den, sobaliba ango aon, local craft balala sayaogo aser iba den kibong rangbeni shilem agitettsüa inyakyim balala ayongzük agi aser sustainable fish farming practices dang sendakba nung expert sessions agia liasü.

Iba sentong ajanga ango metsürtem, parnoki metsüba anogo alizüksüpurtem den sendaktepsü atema maongka agütsüba den maongka balala bushitsü atema lenmang lapoktsüogo aser parnok indang tajangshibatem lemsatepsü maongka ngua liasü.

Sentong nung Director of Community Educational Centre Society Subonenba Longkumer-i sentong nung shilem agirtem, aluyimertem aser partner ajak dang kanga pelaba lemsatepa laisü.

NABARD Ex Chief General Manager Tiakala Ao-i project ajanga terenlok akaba indang lemsatep. Laisa, local farmer tem dang innovative practice tem benoka inyaksü aser NABARD-i agütsüba resource tem takok tashi amshitsü ajungshia liasü.

Maneni sentong nung Dr. Kualalie Tsurho Team leader, Nagaland Bio Resource Mission, GoN, Rongsennungba Director Dept. Of Fisheries & Aquatic resources aser Sub-Inspector Registrar nungeria o tatsütsü jembia liasü.



October 31, 2024 nü taoba mapang Ato kilonser, Indira Gandhi a s ü b a a n o g o m o n g n u n g C o n g r e s s l e n i r, R a h u l G a n d h i - i N e w D e l h i n u n g a l i b a S h a k t i S t h a l m e m o r i a l s e m d a n g a a s ü r n e m a k h ü m a g ü t s ü d a n g t a n g o k b a n o k s a n u n g a n g u r .

November ita nung PM Modi-i Guyana aser Nigeria semdangtsü

New Delhi, Mongputeni/October 31 (Agencies): November ita nung Ato kilonser, Narendra Modi-i Guyana aser Nigeria linük na semdangtsü.

November 18-19 anogotem nung G20 senden nung adentsü atema Modi-i Brazil semdangba mapang nung pai Guyana aser Nigeria nata semdangtsü.

Tang mezüing Ato kilonser Narendra Modi-i Global South nung densema aliba Guyana aser Nigeria na semdangtsü.

Africa nung linük tulutiba Nigeria semdangba ajanga terenlokdak linüktem den India tesendaktep junga aliba sayur, aser Guyana semdangba ya CARICOM (Caribbean Community) den India tesendaktep junga aliba ajanga lir. CARICOM nung züingsem

linük 15 aser associate züingsem linük 5 densema lir.

Modi-i semdangba mapang nung Guyana yimtiba, Georgetown nung CARICOM-India senden amentsüa akok, ta ketdangsertemi metetdaksü.

2019 küm New York nung UNGA senden aliba mapang nung Modi-i CARICOM lenirtem den senden mena liasü. Iba mapang nungji Modi-i, India-i CARICOM den yimtenren, rongsenkettzüng aser sobaliba jenjang tajungba akümtsü atema inyaksü, ta metetdakja liasü.

Iba mapang nungjisa Modi-i CARICOM nung terenlok projects atema dollar sen million 14 agütsütsü sangdong aser solar, renewable energy aser climate- change dak sendakba projects balala atema

dollar sen million 150 aputsütsü nangzuka liasü.

2007 küm taoba mapang Ato kilonser Manmohan Singh-i Nigeria semdangba mapang nung Nigeria aser India na tsüingda asalentong partnership yanglu. Iba sülenjibo tang ang India Ato kilonser kati Nigeria semdangtsü.

2007 küm India aser Nigeria nati defence tsütsü amalitepa inyaksü atema tezüngzüktep ka agia liasü, kechiyong linük ana tsüingda asalentong tsütsü partnership nung defence sector ya kanga tongtibang, ta linük anapronglai bangjem.

Ano 2021 küm nunga India aser Nigeria nati National Security Adviser (NSA) level nung asalentong aser kiralongra anema senden tenzuka liasü.

'One nation, one election' ya tamakoktsü: Mallikarjun Kharge

New Delhi, Mongputeni/October 31 (Agencies): Ato kilonser Narendra Modi-i 'One Nation, One Election' mapa kuma benoktsü tebilemba lemsatepba sülen Brihostibarnü Congress Tir, Mallikarjun Kharge-i, ibaji tamakoktsü, kechiyong iba atemaji Parliament nung telemtetba agitsüsa akümtsü, ta metetdaksü.

"Ato kilonser Modi-i kechi jembio; pai ibaji meinyaksü kechiyong Parliament nung ajaki melunga agizük nung ang

ibaji ataloktsü. 'One Nation One Election' mapa kuma inyaksüji tamakoktsü," ta Congress Tiri metetdaksü.

Brihostibarnep Gujarat nung National Unity Day Parade sentong nung jembidang Ato kilonser Modi-i, "Onoki One Nation One Election atema jembidar, koba ajanga India nung democracy tashi itshitsü, India nung rongsen aika kümzüktsü aser 'terenlok India' nükjidong ataloktsü atema linüki tekeraba nung inyaktettsü. Tanübo

India-i One Nation One Civil Code atema inyakdar aser ibaji Secular Civil Code den mesükteper," ta metetdakja liasü.

India nung Lok Sabha election aser state assembly election ajak mapang ka nung külemi agitsüji tamakoktsü, ta opposition party temi aija arudar.

Ano opposition party karibo, One Nation, One Election ya federal inyakyim aser democracy raksatsütsü nükjidong nung lir, ta aitsür.

Taküm September 18 nü Union Cabinet-i 'One Nation, One Election' agizükogo.

Nov. 6 nü MVA-i nüboyim tenzüktsü: Sharad Pawar

Pune, October 31 (Agencies): Opposition teloktep Maha Vikas Aghadi (MVA)-i Maharashtra assembly elections atema November 6 nü nüboyim tenzüktsü, ta Brihostibarnü NCP (SP) tongti, Sharad Pawar-i metetdaksü.

Pawar-isa, election nüboyimji pa den Congress lenir Rahul Gandhi aser Shiv Sena (UBT) tongti, Uddhav Thackeray nung lenisüba nung agitsü, ta metetdaksü.

Pune district kübok Baramati nung osangbenertem den jembidang Pawar-i Diwali salem lemsatepba den külemi state nung nüburtem azükarutsü aser taküm anema alitsü atema pai sarasademtsür, ta

metetdaksü. Assembly menden kar nungbo MVA teloktep nung densema aliba party tem- NCP (SP), Congress aser Sena (UBT) ajaki tokteptsü asü, ta asüingdangba langzüdang Pawar-i, MVA nungi candidate ananai tenüing agütsüba constituency 10-12 shi dang lir, ta ashi.

MVA teloktep nungi Congress-i menden 103 nung tokteptsü, Sena (UBT)-i menden 89 aser NCP (SP)-i menden 87 nung tokteptsü. Ano MVA nung dena aliba party kari menden 6 nung tokteptsü.

Maharashtra nung assembly menden 288 atema November 20 nü election agitsü aser November 23 nü vote azüingtsü.

LIST OF SELECTED PARTICIPANTS FOR STATE HANDLOOM EXHIBITION AT URBAN HAAT, DIMAPUR, NAGALAND W.E.F. 04/11/2024 TO 17/11/2024.

Sl. No.	Name	Address
1	Imsunungla	Mangmetong, Mokokchung District
2	V. Kazhevi Sema	Suruhuto Town, Zunheboto District
3	Ngjipchen	Chingkao, Mon District
4	Lily Sangtam	Singrep, Kiphire District
5	Ngjipyoh	Aboi Town, Mon District
6	Razouselu Chizo	Chepoketa Village, Phek District
7	L. Toimei	Yachem Village, Longleng District
8	Simu Rengma	K. Station, Kandinu, Kohima District
9	Ivuto Ayemi	Zunheboto District
10	Avito Achumi	Kenuozou Colony, Kohima District
11	Chumtongla Sangtam	Rest House Ward, Kiphire District
12	Nakkai	Mon Town, Mon District
13	Limainla	Changtongya Town, Mokokchung District
14	Imsho Phom	Longleng District
15	Talitula	Changtongya, Mokokchung District
16	J. Lotsani Yanthan	Elunyo, Wokha District
17	Initoli Y Achumi	Suruhuto Town, Zunheboto District
18	Moabenla	Salangtem Ward, Mokokchung District
19	Nepfusalu Rose	Thipuzu Village, Phek District
20	Khelito X Sumi	Zunheboto District
21	Imlimenla	Tongdentsuyong, Mokokchung District
22	Katichu Apfutir	Phor Village, Phek District
23	Molongrenla	Lower PWD, Kohima District
24	Imolemna	Yimjenkimong Village, Mokokchung District
25	Lokheni	Surumi Village, Zunheboto District
26	Imtimongla	Miathukhel, Sovima, Chumoukidema District
27	Temsuchila	Molongkimong, Mokokchung District
28	Khuluto Yeotho	Zunheboto District
29	Punalemla	Kumlong Ward, Mokokchung District
30	Moakum	Molongkimong, Mokokchung District
31	G. Ngonlon Konyak	Sheanghah Tangten Village, Mon District
32	Sashimenla	Longchem, Mokokchung District
33	Nagaland Sales Emporium	Kohima, Nagaland
34	M. Limasangla	Tuli, Asanghma, Mokokchung District
35	Beino	Kohima District
36	Arenla Ungma	Mekumpongsegongma, Mokokchung District
37	Lipongla	Rest House Ward, Kiphire District
38	Lily Sote	Kohima Town, Nagaland
39	Washimenla	Akhoya Village, Mokokchung District
40	Saraholi	Kuhuboto, Niuland District
41	Vinoli	Suruhuto Town, Zunheboto District
42	Watisola	Bethany-1 Colony, Phek District
43	Liotoli V Zhimo	South Point Colony, Zunheboto District
44	Pelhoutuou	Chumoukidema District
45	Tiasula Ao	Longleng District
46	Tsuktimenla	Mangkolemba, Mokokchung District
47	Medole Kapfo	Midland Colony, Kohima District
48	Pangla	Jail Colony, Kohima
49	Aleminla	New Medical Ward CTN, Mokokchung District
50	Mohd Rafeeq Seikh	Jammu & Kashmir
51	Bina Pani Pathak	Jorhat, Assam
52	Abhijit Pathak	Jorhat, Assam
53	Projolita Hazorika	Jorhat, Assam
54	Mitali Borah	Jorhat, Assam
55	Junmoni Taye	Choraidew, Assam
56	Shahida Khatun	Kamrup, Assam
57	Binti Mech	Dibrugarh, Assam
58	Chinu Gogoi	Sibasagar, Assam
59	Intaz Ali	Borpeeta, Assam
60	Bornali Taye	Charaideo, Assam

NB:-

- The selected participants are directed to report to the exhibition ground at Urban Haat on 4th Nov at 7:00 a.m
- The participants are directed to keep their exhibits in their stall under lock & key. The office shall not be held responsible in case of any losses/theft.
- Selected participants must display genuine products with full stock, failure to do so will result in revoking their participation from the exhibition.
- Selected participants are informed to reach at scheduled time. In case of failure, their participation in the event will be revoked.

Sd/-
Managing Director
NHHDC Ltd.



October 31, 2024 nü Sardar Vallabhbhai Patel asoba anogomong nung Kevadia nung 'Statue of Unity' anasa 'Ekta Diwas Parade' sentong agidang tangokba noksa nung angur.



TIR YIMYIM YIMOBILEM (EDITORIAL)

DIMAPUR ROGONÜ, OCTOBER (YIMPOKSÜI) 01, 2024

Tatalokba lir, Terenlokba mali

Nagaland nung tasen-tasen atalokbatembo kanga lir saka terenlok babo tilkata mali, yimsüsürtema o dang ashi senotsüa maka aser mapaa maka ta ali mali memetetka timtem nung alitsüa akok. Aji oda, Nagaland nung yashi-yakanü tashi nung atalokbatema repringdangra, tatalokbatembo tulu aser tangatsüa aser tereprangtsüa tajung saka kodangang kechi tajangzük angutsüar meshitetsüsa atalokbatem dang ataloka angur. Item tatalokbatem rongnung tongtibang kaji, Eastern Nagaland People's Organisation (ENPO) purtemi akangba ama Nagaland state nungi kenyongi balaka razüka maoyonga, Nagaland-bo Nagaland state kübok alitsü saka Nagaland anüdoklen aliba district 6 kübok aliba nübortem asoshi terenlok mapa inyaksü aser tajangzük shitak agütsütetsüsa government nung ketdangsüba aser senotsü amshiba inyakyim balaka mejamejaa agütsütsü atema Nagaland state government-i center government dangi yoktsü telemtetba agiogo. Atangji, ENPO-temi mezüngbo Nagaland state nungi balaka razüka orr Frontier Nagaland kümnüa liasü, ajisüaka mapang kenpiga ENPO nung lenirtem o Eastern Nagaland nungi adokba MLA-tem na kenbang obang memedemet arur tang tesüsa Frontier Nagaland Territorial Authority (FNTA) ka kümtetsü asoshi tangatettep kati arur Nagaland state nem agütsüogo aser Nagaland state-i center government dangi yoktsü. Atangji, FNTA akümbaji state tasen ka akümer masü, anungji Nagaland state ajanga Nagaland anüdoklen alirtemi aginüba ama FNTA jenjang ka aginüa yokba tebilembaji center government-i agizüksü imlar. Ajisüaka, ashiko, iba jagibo kidang menden aser chisu renlokba dang ashi, alijak nung nübortem ajangzüksüsabo merenloktetsüka akok. Aji oda, yimten menden tasen kar kümteta yur temeshir aser tagizükertemang aika aküm ashi, shitakba, nübortem den lia parnok meima inyakerkem teka agibo tang amai anüngtsüa akok. Iba ama kaji yimdangi arua bilemdang, state mesüra Union Territory balaka ka mesütetra, FNTA akümtsüba osang dang nungibo, ashiko, Pangsha aser Longwa tashi National highway kanga junga renemogo ta asüba osang tajungba süla ta bilema arur. Iba amaji, kasa state küboksa Authority tasen ka akümyonga asenok temulungjang aser teka memelenshira, iba Authority jagi kecha balaka merüka meinyaktetsü. Aji oda, FNTA akümtsü ta asüba osang dang nungibo Tuensang len Medical college tuluka lapokogo aser Mon len Engineering college lapokogo aser Eastern Nagaland nung Hydro project tuluka lapokogo ta asüba osangtemang tajungba süla ta kanga sasasetta bilemer. Atangji, tajung aser terenlok mapa inyaksü asoshi menua mali, anungji FNTA kümtet metetetba itemji inyaka oa angutsü imlar. Iba tatalokba den ano tang Nagaland nung atalokba osang tasen kaji, Phek district kübok aliba Puchury kin alidak lima Meluri nema district jenjang agütsütsü government-i lemtetba telemtetba ya asütsü. Atangji, ibaji ajak atema osang tajung lir, kechiyong Meluri ya Naga nung kin temeja Pochury nung aliba lima lir aser parnok asoshi Phek nungi yimten mapa inyaksangshitsüba timtema lir. Ajisüaka, mapang tatsüka tsüngda Nagaland tilaka nung ya district 17 tashi küma aoba yagi terenlok mapa inyaksü melen government mapa inyakerkem nemang ita sen magütsütet küma adoktsüa akok. Aji oda, tenüng agi Authority ka kümtetsütsüji tasak masü aser district tasen ka kümtsütsüjia temela, saka item authority-temji amshia terenlok mapa inyaka aotsüba temela masü. Iba jagi tawa akümba district tasen nungbo department aika district office melapokteter. Aji oda, district tasentemjibo yutsür district tejentem nunga government ali mali ka dang, terenlok mapa inyakba aser government meyong office, mozü ki aser school-tembo kibur-a mali amai aika sentoka yuja lir. Iba ama osang tasen tasen anogo shia atalokba angashidang, kidang mapa maka kinungertem rongnung ki oset lema amunger amai bilemer. Atangji, ano osang tasen kaji NNPGs purtemi taküm kümsa India den telemtetba kati arutsü imlar ta metetdaksüba asütsü. Ajibo, tasensa memetdaksüyonga telemtetba kati aru kanga meshiogo.

OLEMSABANG

ABAM NUNG NÜTSÜNG LENISÜBA (LAY LEADERSHIP) NUNGDAKBA OCET ZÜLUBA NUNG O-SEMLOK

~ L. Kika Pongener.

(Yashi adok nungi...)

Ano tanabuba nung ABAM sanen luden aser tanga luden ajak nung züngsem ya-a toklang tenzüker/laishir rongnungi tesadang (50 %) aser nütsüng (Layman) rongnungi tesadang (50 %) ta shima inyakba kanga agi tajungba asütsü ta nübör aikati bilemer aser aginur. (Tatishitsü...Church Advisory Board koba nung Ordain minister dang asütsüla ibala mesukba luden dak alaka). Temalen shisemba ama ABAM ya laishir mungdang ka masü, arogotem nung aliba nütsüng-nübör tamangertem ajunga longjemer akümba mungdang ka asünungji, ABAM luden balala nungji laishir temeja agi anira, mesura laishir züngsem teimba ser anira, aiben laishirtem taginubalen tuluba atsünga ken o telemtetba ajak agishia atatsü, aser idangji nütsüng-nübörtemi temulong masütsü. Tanüa lokti senden/mongdang nung ken o lemtetba nung nütsüng-nübörtemi mulong masüba otsü aikasa jembiba angazüker. Ano 'Nungtet luden' (Nominating Committee) ya küm tatem mongdang (Central Council) alidang ajongbena shimer inyakdaksüba nungji timtem tetsükdaksü aika ajurua alitsü sudi. Ashiko, mapang kar nungpo tapet/tetemsu nubu monguteti timtem ajurua alitsü akok. Anungji 'Nungtet Luden' ya-a 'Standing Committee' ka asübaji kanga agi tajungba asütsü ta lenniri züluba denji semloka tebilemba-a lemsateper.

Asen lennir laishir rongnung teintet aser tantsü-tambu ka aser küm aika tenzüka mapa balala nung tenzüka arudang pai ajangshiba aser nübör tebilemba/taginuba ola angazükba, item ajak denji medemdanga shisadanger, iba ya tajungtiba asütsü ta nübör den lemsatepa züluba ocet ka ta rajemer. Anungji ABAM nung lennir aser sanen luden shir lidir, parnoki arogotem nungi aruba tebilemba (Agenda)-tem den, ano nütsüng-nübör tebilemba aser taginuba ola, kobasa osangkaket (Media) nung lemsateper, item tebilemba aser taginubatemjia, arogo/mungdang asoshi tim dang sura, angadanga, shisadanga, bilemdanga suoka jembingungpo, arogo/mungdang asoshi langkabo tajangzük sudi-su ta bilemer. Kechiyong nübör aika nungi shisatsü bendena tebilemba lemsatepba jagi arogo/mungdang asoshi tajung langkabosa adoktsü sudi ta bilemer. Aji oda, mungdang nung tekolakpur/lennirtemi nübör tebilemba, taginuba aser ayimtenba ola angashira....Ibajagi asen mungdang tali tashi-taitba aser telongjemba asütsü sudi, kechiyong osangkaket nung tebilemba lemsatepba ya ocet zülur kija tebilemba aser taginuba masü nütsüng-nübör aika tebilemba aser taginuba ola amai agidaktsünur.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Tatok meshiba tekülem sentong nung Korea nungger million 2.1 aden



October 27, 2024 nü Reformation Sunday anogomong nung South Korea yimtiba, Seoul nung Arogo aser denomination balala nungi Khristanem longjemmer tekülem sentong agidang tangokba noksa nung angur.

Seoul, October 31 (Agencies): Reformation Sunday, October 27, 2024 nü South Korea yimtiba, Seoul nung Tsüngrem dang tatok meshiba, asentenshi aser loktiliba nung temelenshi adoktsü atema longjemba tekülem sentong ka nung Korea nungger Khristan million 2.1 aden.

Iba tekülem sentong ayongzükertemi ashiba agi, tsüngsang-mopung mejungaka Khristan million 1.1 shi moapu nung adenshi aser million 1 online ajanga iba sentong nung aden.

Tekülem sentong nungji Korea nung denomination balala nungi Arogo aika aden aser parnoki linük atema sarasadema liasü.

South Korea nung anti-discrimination ozüng benokba ajanga kasa atsüapong kiyimtsü (tetsür o tetsür na mesüra tebur o tebur na kiyimtsü) asoshi lenmang lapoktsütsü aser ibaji ajanga kibongtem nung takoksa anguba den külemi Arogotem temeden-a kongshitsü, ta arendaka Khristanem telongjem sentong ya ayongzüka liasü.

UK aser Canada ama linüktem nung atalokba atishia lenirtemi, tang ama mapang ka nung tamangertemi ola madokra Korea-ia kasa tiaji ajurutsü, ta metetdaksü.

Iba sentong nung jembidang Sarang Arogo nung tongti pastor, Rev. Jung-Hyun Oh-i, "Tanü asenoki tanela nung aser atangji nung iba tekülem sentong agir. Yamaji kibongtem aser Arogotem taküm alitsü aser asentenshi milak tasen ajangshitsü," ta ashi.

October 27, 2024 nikongdang ayongzükba sentong nungji onük asem nung sayutsüngia liasü. Arogotemi ola adoktsüji kanga tongtibang, kechiyong ibaji

ajanga dang kibongtem aser tanurtem kümzükä alitsü, ta o jembirtemi ayongzük.

Pastor kati, "Onoki tatok meshiba agizükang aser onok kibongtem kümzükang," ta sarasadema liasü.

Kasa sentong nungji UK aser Germany nungi o jembirtemi Korea nungger Khristanem dang, nenokibo kasa lenmang nung mejajatsüla, kechiyong nenoki tanga linüktem nung atalokba nguogo, anungji alima tesem balala nung Arogotem atema nenok tesangwa sayurtem asütsüla, ta ayongzüka liasü.

UK nung Wilberforce Academy nung lawyer, Andrea Williams—i, "Britain-i Tsüngrem amadoktsü, ta shibaibo meteta liasü? Parnoki lokitliba nung Yisu Khrista agienadok. Nisung aikati Yisuji shibar memetet. Tebok nung aliba tanur raksaa indoktsü aser kasa atsüapong kibong akümstsü atema parnoki temelaba agütsüogo. Yimti lenmangtem nung sayutsüngirtem jail nung puoker. Laishiba lema agütsürtem aser mapa inyakba tesem nung sarasademertem nem temerenshi agütsü. Item ajak ya atalokdar, saka Britain nung Arogotemi ola madoki amoi aor," ta metetdaksü.

October ita tetenzüklen-a UK nung tanur raksaba clinic ka anasa sarasademba atema Khristan ka apu aser lenmang nung sayutsüngirtema jail nung puoker.

Iba sentong nungji shilem agiba Arogotemi Korea nung temelenshi adoktsü atema külem sangdong ka renema metetdaksü.

Iba sangdong nungji Arogotemi pei teinyaktsü shilem meinyakba atema Tsüngrem dang tatok meshitsüla, ta metetdaksü.

Kasa sangdong nungji kibongtem kümzüktsü, yimsü temeden aser pei tebilemba

sadoka jembitsü temeden kümzüktsü, iba dak alia Arogoi loktiliba nung metsü aser tesangwa shilem agitsü, ta metetdakja lir.

Kasa sangdong ajanga Arogotemi South Korea sorkar, Constitutional Court, National Assembly aser Ministry of Education dang kasa atsüapong kiyimba melatsüsa ozüng kecha meyanglutsüla aser astüapong dak sendakba tangatetbatem school textbooks nung mamshitsüla, ta mepishia metetdaksü.

Reformation Sunday anogomong nung ayongzükba sentong tatembanglen organizing committee-i, "Iba sentong nung adentsü arurtemi loktiliba nung Arogoi pei shilem inyaktsü nangzükogo. Iba sentong ya Korea Arogo atema meyipa reprangshitsü asoshi tongtibang sentong ka lir, aser Arogo shilem atema alizüng ayuba anogo ka lir," ta metetdaksü.

Iba sentong jakdang interview ka nung jembidang organizing committee chairman, Rev. Hyun-bo Son-i, "Kasa atsüapongertem onoki mesempar. Onoki parnok dang kechi inyaktsüla mesüra kechi meinyaktsüla, ibaji mashir. Ajisüaka Korea nung kasa atsüapong kiyimba melatsü atema ozüngtem agizükra Khristar Arogoi pei tamang jenjang atema menokdaktetsü, aser pei tebilemba meshitettsüsa tensa arutsü," ta metetdakja liasü.

North Korea nung kasa atsübong kibong akümstsü temelaba agüja ozüng yanglura ibaji ajanga kija-kibongtem kongshitsü, anungji iba ama tia nungjagi linük kümzüktsü nükjidong nung Korea nung aliba Arogotem longjemtsü asoshi Rev. Hyun bo So-i iba sentong ya ayongzüka liasü.

ANOGO ABEN TSÜNGREM DEN

Nisung Yimya

- Lipok 1:24-31

Atangji alima nung aliba shiruru dang nungi meimchirji balaka asü ? Shiruru lima nung meimchir indang shisadangtsübaji kuli aika lir. Tanga shiruru ama pa asor, tangu sashir, achir, mejanger aser asür.

Kechi nung balaka ? Khristan theologyji nisungji Tsüngrem mesüka yanglu ta ashir (Lipok 1:27). Shiruru yamaji masü. Teyangluba nung nisungji balaka yanglu ta sangdongbaji asenoki metettsü tenüngdaktsü. Pa Tsüngrem dang nungi teküpbokba kechiaser pa Tsüngremi yanglu, pa shiruru dang nungi temaba kechiaser pa Tsüngrem mesükba nung yanglu.

Atangji asenok tetsübutsü ka aser tesüngmangtsü ka yanglu (T.Ken 139:14). Itemi shisadangang: Laishibai ashir, asenok shiruru dang nungi temaba. Süra kechiba aikati akhüm dang nungi teküpbokba nung shiruru jakla ama alir aser inyaker ? Meimchir libaliro ajak nung asenoki shibai asenok Pa mesükba nung yanglu, Pa ama alitsü merangtsüla.

Sarasadem : Ne tashikang akhüm kübok ni miimang : tenükjang ama ni kümzükang. T.Ken 17:9.

Tenangzükba: Kechiyong shibai nenok dak kongshir Pai pei nükjang nung kongshir.

The Best Christmas Pageant Ever (PG) November 8 nü sayatsü



October 31, 2024: 'The Chosen' Director Dallas Jenkins-i, pai yangluba Khristmas film tasenba ajanga Arogotem dang Khrista osangtajung prokba den külemi sensaker kibongtem dang temeim sayutsü ayongzükter, ta metetdaksü.

'The Best Christmas Pageant Ever (PG)' film ya November 8 nü theaters nung sayatsü.

Iba film otsü ya Barbara Robinson-i züluba kaket nung ajemdaker yanglu aser 'The Chosen' Director, Dallas Jenkins-i direct asü.

Dallas Jenkins-i, pai par chirnurtem dang iba kaket nungjagi otsü zünga ashiba mapang nung pa nük nungi nüktzü alua liasü, ta metetdaksü.

tatembanglen loktii shilem agiba otsü nung ni ajep tenzük. Ni kü kinüngtsü Amanda nem kaketji agütsü aser lai azüngdang la-a ajep, anungji lai tanaben kü nem kaketji agütsü. Iba mapang nungjagi tenzükä küm shia Khristmas mapang nung onoki kaket azüngba dang masü saka tanurtem danga zünga ashir aser küna ajepdang tanurtemi pelatapa küna menutsür," ta Dallas Jenkins-i metetdaksü.

Jenkin-i iba film yanglutsü atema temelaba meshiba ama temelaba ajak ngua liasü.

Iba film nung tongti shilem agirtemji Judy Greer (Ant-Man), Lauren Graham (Gilmore Girls), Elizabeth Tabish aser Kirk B.R. Woller (The Chosen) nungger lir.

Iba film nung Arogotem atema tangazüktsü aika lir, ta Jenkins-i ashi.

"Iba film tatembanglen tesüsaba orenji yamai lir 'Na atema tanur ka soja lir.' Yisu Khrista na asoshi alimai aru," ta Jenkins-i metetdaksü.

AO OSHI ANGAZÜKDAK:
TANÜ ANGAZÜKTSÜBA OJANG



Tara

(adj) tachi mashi, tasüa majem inyakba (tough, fearless)

* Samaruba nisung kanga tara liasü.

Tara

(adj) temenen tesashi aliba li (hunted place)

* Ali tara nung tanur kisung malir.

OLONG PAITEP # 6968

1		2		3		4		5
			6		7			
8								
					9			
		10						
11								12
				13			14	
15								
16						17		

TIPIEN

- 1. Nüji masü - (4)
- 3. Techinütsüka - (6)
- 7. Aketa shirangba - (5)
- 8. Pi - (6)
- 9. Amena - (5)
- 10. Kinü - (5)
- 11. Tanang masü - (5)
- 13. Lenmang - (6)
- 15. Nübo tedi - (5)
- 16. Tuoshi - (6)
- 17. Shiruru apuba temenatsü- (4)

LANGTSÜNGLEN

- 1. Jila tulu - (5)
- 2. Sarasademdang tembang - (4)
- 4. Tarutsü indang ashirtem - (6)
- 5. Alia - (5)
- 6. Mojing - (5)
- 9. Tai inyakba metet - (5)
- 10. Medemer chijiba - (6)
- 11. Tatokba / Amadok - (5)
- 12. Anüngdang masü - (5)
- 14. Jabaso masü - (4)

OLONG PAITEP # 6967 TELANGZÜBA

TIPIEN :

- 1. Tesangra, 5. Mungo, 7. Kisen,
- 8. Salem, 12. Semki, 14. Kilem,
- 15. Kensü, 16. Sangpang.

LANGTSÜNGLEN :

- 1. Temesen, 2. Raksa,
- 3. Aon, 4. Aso, 6. Nile,
- 9. Alizüng, 10. Omen,
- 11. Lemta, 13. Ola, 14. Kin.

NAI-A YA METETTER MA



India tetsür football team captain Ashalata Devi ya India tsürtem rongnungi international asaya 100 ka asayaba mezüngbuba asayar kümogo. October 17 nü Dasarath Stadium, Kathmandu nung SAFF Women's Championships 2024 nung Pakistan den asayaba mapang lai iba alizüng tongteta liasü. Arishi küm 31 tain Manipur tsürta ya India team nung mezüngbuba 2011 küm March ita Bangladesh den Dhaka nung pre-Olympics asayamung ka nung shilem agia liasü.

Manipur nung nisung ti sota ayu; nisung 145 maitüsü jangjashiogo



Loktak police station kübok Loktak Lake anasa Santipur nungi Macha-ibema tashi yimtsüng balala meita aoba noksa nung angur.

Imphal, Mongputeni/ October 31 (Agencies):

Manipur nung taoba ghonda 24 tsüngda nisung ti sota yuogo aser tanur aser tetsür densema nisung 145 maitüsü jangjashiogo. State kübok lendong ataloktsü ana nung aliba tesemtem meita aoba mapang item nisungtem ya sota liasü.

Police aser central paramilitary force tem longjemer Brehostibarnü Loktak police station kübok Loktak Lake anasa Santipur nungi Macha-ibema tashi yimtsüng balala meita aoba sentong ka

ayongzüka agia liasü.

Meita aoba mapang ajak senteper ki 153 meita ao aser tetsür aser tanur densema nisung 145 indang identity card tem asadanga parnok maitüsü jangjashiogo. Brehostibarnü iba inyakyim ya ghonda 4 dak tema agia liasü.

Police-i ashiba agi, ajak senteper state kübok tongtibang tesemtem nung checkpoint 109 amenok aser state kübok district balala nung tetuyuba anema inyaksangshiba atema nisung ti sota yuogo.

NH-37 aser NH-2 nung

tenüngdakba osettem bener jajaba gari 201 aser 351 kecha tetsükdaktsü makai senzüdaktsüogo.

Lendong ataloktsü ana nung aliba tesemtem nung security jenjang tesashi agiogo aser garitem kecha tetsükdaktsü makai sadem sadema senzütsü atema lenmang nung tesem kar ajangba mapang security convoy-i garitem meiner aoer.

Police-isa, sota alirtem dang ken o maneni ashishitsü atema ken o dak sendaka aliba police station tem nem bendanga agütsüogo, ta shisem.

Zeliangrong nungertemi tetsü tebou ali wazüka toktsütsü akhang

Imphal, Mongputeni/ October 31 (Agencies):

Zeliangrong nung shirnok Assam, Manipur, aser Nagaland arrtsü nung alir parnoki Manipur University, Imphal west district anasa Heibok Hills nung yimtsüng asem kübok parnok tetsü tebou ali wazüka toktsütsü takhangba agütsüogo.

Zeliangrong United Committee Manipur Valley (ZUCMV) tir Maibon Phaomei-i, Manipur sorkari tawa Heibok Hills ya reserved forest ka kümtsütsü asoshi teletetba agiba aitsüogo.

Parnoki ashiba agi, sorkari arem wazüka ayutsü atema merangdangba ajanga tang Zeliangrong nung aliba

Langthabal Chingkha, Langthabal Chingthak aser Langthabal Khoupum yimtsüngtem dak mekongshitsüla.

Item yimtsüngtem nung Kabui/Rongmeis (Zeliangrong) nungertem ya lisopur ama alitsü atema chuba Maharaja Pamheiba shiba dang Garibniwas (1709-1748 AD) ta ajar pai temelaba agütsü liasü.

ZUCM tir-isa, Langthabal Chingkha, Chingthak, aser Khoupum yimtsüngtem ya reserve forests ama mekazütsütsü atema Wangoi Forest Division sentong ya tejakdangi bener maotsü atema ketdangsürtem nem tekümdangtsü metetdaktsüogo.

Manipur Information and Public Relation Minister Sapam Ranjan-i October 24 nü sangdong ka ajanga Heibok Hills ya Reserved Forest ka ama mekazüka ayutsü ta metetdaktsüba sülen ZUCMV-i iba telangzüba agütsü liasü.

Temetetsü kaji Manipur Land Revenue & Land Reforms Act, 1960 Section 2(w) dak ajemdaker Heibok Hills ya taoba mapang "68-Heibok Ching" ta nüngja agütsür revenue yimtsüng ka ama 2014 küm December 2 nü gazette notification ka ajanga sangdonga liasü. Dr Sapam-i ashiba agi, iba gazette ya yanglushia Reserve Forest ama jenjang melenshitsütsü.

Meghalaya: Tribal tesayurtemi NEHU kaketshirtem pusemer

Shillong, Mongputeni/ October 31 (Agencies):

North-Eastern Hill University (NEHU) nung Meghalaya Tribal Teachers' Association (MeTTA)-i, Registrar, Col (Retd) Omkar Singh agintsü atema NEHU Students' Union's (NEHUSU)-i akhangba pusemogo.

MeTTA-isa, NEHU Teachers' Association's (NEHUTA)-i tawa shimba Deputy Registrars ana agintsü atema akhangba pusemogo. Deputy Registrars tasen ana ya

achaayangtsü atema temsüa mali, ta shia NEHUTA-i tena mapa nungi agintsü khangogo.

Iba lokti tentet yagi, Registrar aser Deputy Registrars inyakyim meshidakba indang süoki ia bilemba lemsatepogo aser ashiba agi, parnoki temsüng ozüng, aser administrative inyakyim indang tejangja meteta mali.

Association-isa, state sorkar kübok department balala nungi temsü aliba candidate tem Deputy Registrar mapa atema sentoka toktsü aser

parnok melena university achaayangtsü asoshi tajangshiba peria maliba aser metemsüba candidate tem shimogo, ta ashi.

Maneni MeTTA-i ashiba agi, Integrated Teacher Education Programme (ITEP) atema tawa contract nung ketdangsürtem shimba nunga inyakyim meshidak lir, kong temsüa aliba candidates tem interview nung shilem agitsü atema temelaba magütsü aser parnok melena parnok dang nungi qualification tejemba aliba nisungtem shimogo.

North Korea-i intercontinental ballistic missile ka tendang



Seoul, Mongputeni/Oct. 31 (Agencies): North Korea-i intercontinental ballistic missile ka khadokba minute 86 shi anüglak nung yima orr par linük anüdoklen tzyüim nung tsüing, ta South Korea aser Japan-i ashir, koba anüing nung talangtiba ayimba alitsü.

ICBM ya 'sharply-raised angle' mimh khaloktsü aser anüngleni 7,000km (4,350 miles) atu. Anungji iba missile ya tera mangar khaloktsü asübo ano meta talangba ola ta ashir.

Brehostibarnü tendangba ya UN-i aziökba nung aibelenba ka lir aser Korea linük ana tsüingta tesendaktep tamajungba akumba aser Pyongyang-i Seoul tsütsü yimya tamajung tali inyakba mapang ka nung ataloker.

North Korea yagi November 5 nü US tir election agitsü anasa ICBM khadoktsü renemtar, ta South Korea-i Bodhbarnü tekum dangtsü shia liasü.

Meta talangba nung khaloktsütsü asoshi nok-nü yanglutsü tebilemba nung iba missile ya tendang, ta Seoul indang defence ministry ajanga ashir.

North Korea lenir Kim Jong Un-i kasa anogo sangdong ka

nung iba missile tendangba ya ajanga asen tsükchir nem telangzüba agütsütsü temulungtetba sayur aser ibai mitkar inyakyim tetemsü, ta shia oiasü.

"North Korea-i kodanga nuclear forces tashi ulushiba memelenshitsü ta kü tangatetba lir," ta Kim-i ashir.

Brehostibarnü tendangba ya UN Security Council pangzüing balala nung aibelen lir, ta US-i ashir.

"Iba ya ajanga North Korea-i maneni nübur ajungtsü dang nungibo ozüing alema 'weapons of mass destruction' aser ballistic missile programmes tem nung tali temulung agütsüba sayur," ta White House indang National Security Council odongtar Sean Savett-i sangdong ka nung ashir.

Brehostibarnü nok-nü tendangba nung telangzüba agüja North nem tenokdangba tasen agütsütsü, ta South Korea-i ashir.

Pyongyang-i ICBM ya December 2023 nung tatemsa tendanga liasü, koba UN tenokdangba anema liasü. Iba missile ya minute 73 shi jaja aser meta 1,000km shi ao.

North Korea mongin temi

missiles indang payload timba kumdaoktsütsü nukjidong nung tendang ta ashir.

Pyongyang-i warhead tuluba aser taretba mesüra warheads ka dak tema benera US mainland nung amaktsüsa missiles yanglua arur, ta University of North Korean Studies nung assistant professor Kim Dong-yup-i ashir.

Kidanger linük, Japan-ia Brehostibarnü tendangba meita repranga liasü ta ashir.

Iba missile khadokba sülen South Korea aser US ketdangsurtem ajurutep aser telangzüba balala aser tesashi agütsütsü mulungtep, ta South Korea indang mitkari sangdong ka nung ashir.

"Asen mitkar tem ajak renema lir aser North Korean ballistic osangtsüsang US aser Japanese ketdangsur den lemsateper," ta ashir.

Vladimir Putin-i Ukraine nung raraba yaritsü asoshi North Korea-i sepaitem Russia-i yoker ta South Korea aser US nati tai tongloksüba sülen Brehostibarnü iba missile ya tendanga liasü.

North Korean sepai 10,000 shi Russia anüdoklen training agitsü yoka lir, ta Pentagon-i asadangteta lir. Telok tilaka Russia anüolen Kursk nung yoka lir aser ano meyerijang aika lenmang nung lir, ta US-i hopta tetenzüklen shia liasü.

Russia nung North Korean sepaitem lir ta ashiba ajanga Putin aser Kim tsüingta tesendaktep tali akangshiba sayur. Pyongyang aser Moscow nati sepai yokba indang sangdong balaka agüja mali.

US election 2024: Elon Musk okadaki arutsü tuyu



Philadelphia, Mongputeni/Oct. 31 (Agencies): US election asoshi tongtipang state tem nung Elon Musk indang political campaign teloki voters nem sen \$1 million agütsüba dak sendkba nung court kati pa okadaki arutsü totuyuba agütsü.

Ita tetenzüklen Musk indang campaign group, America PAC ajanga senotsü agütsü tenzük, koba yimya shidak masü aser taoba tir Donald Trump yaritsü asoshi nübu ayimba yimya ozüing agi memelaba ka lir, ta pa anemer temi ashir. Arishi küm 53 tain Musk ya Tesla aser SpaceX amala company tem kibur lir aser pai taküm US tir election nung Trump bhukuma

nokdaker.

Hombarnü Philadelphia District Attorney Larry Krasner, shiba Democrat lir, pai America PAC sweepstakes anendaktsütsü meranga ken o benok, koba Election Day tashi alitsü renema lir.

Iba sweepstakes ya tongtipang states tem nung vote agütsütsü temsüa alir shiri Constitution bhukuma petition ka nung meyonngem agütsür, parnok atema lir.

Ajisüaka iba inyakyim nung nüburtemi parnok indang 'personal information' agütsütsü shia lir, ta Krasner-i ashir. "America PAC aser Musk

nungeri Philadelphia aser danga Commonwealth nung nübur süngjendaktsür - parnok indang personal information agütsür aser political pledge agir aser iba melen sen \$1 million angutsü maongka agütsür," ta ken o nung shia lir.

Bodhbarnü Philadelphia Judge Angelo Foglietta-i Musk densema party ajunga dang Brehostibarnep 10:00 ako nungi iba ken o jembiba nung adentsü totuyuba agütsü.

"Iba ken o jembidang party ajak alitsüla," ta obendangeri zülu.

Ajisüaka alima nung takartiba okadaki arutsü asü masüar mejangja.

November 5 nü agitsü aliba US tir election nung Trump bhukumer, ta Musk-i July ita sangdonga liasü.

Iba sülen pai sapang balala aser rongsen amshia Trump yarir.

November ita Trump aser danga Republicans temi takok anguba nung yaritsü atema political action committee nem sen \$70 million dak tema agütsütsü pai nangzüka lir.

ALI TAYOKTSÜ LIR	OLD SHOWUBA NUNG ALI AYOKER FOURLANE FLYOVER ANASA For more details : 9863826159
-------------------------	--

AO RIJU SANGDONG

Mokokchung District kübok Private School-tem asoshi Ao Tazüingtsü Kaket koba SCERT ajanga adoker, item kaket taruba küm 2025 atema Ao Riju-i achaaayanga anepalutsütsü. Anungji School Headmaster/Headmistress mesüra Head Incharge shiai class shia kaket kwiya agitsü tejangja tezüluba nung Yimpoktsü 15, 2024 tashi nung Ao Riju Office tongjang ta sangdonger.

Sd/-
(Rev. Prof. Rongsen Lkr)
Mendenbuba, Ao Riju.

Israel den rara anena alitsü mulunga lir: Naim Qassem



Beirut, Mongputeni/Oct. 31 (Agencies): Israel sepaitemi Hezbollah telok tashi ita aliba tesemtem nung bomb poklokja makyonga aoba mapang, iba telok indang lenir tasenbai telatetba kar kübok ceasefire alitsü akok ta Bodhbarnü ashir.

Israel indang security cabinet senden ka mena rara anena atatsü asoshi jembiba mapang ka nung Naim Qassem-i iba sangdong ya agütsü, saka Israel-i Lebanon anüdoklen Baalbek yimti amak aser ano Hezbollah commander ka tepset ta ashir.

Taoba ita Israel-i tayimtsü amshia amakdang Hassan Nasrallah tepsetba sülen Qassem ya Mongulbarnü Iran-i yariba armed movement, Hezbollah indang lenir akum.

Pa menden agizükba sülen mezüing jembidang, Hezbollah-i ita aika Israel-i tayimtsü amshia mesüra alilen nungi amakba nokdangtetsü, ta ashir.

Ajisüaka paisa Israel-i dang aginera rara anena atatsü asoshia pai kishi lapoktsü.

"Israel-i tashiyim amshiba anentsü telemtetba agira, onoki agizüktsü ta ashir, saka onok asoshia tapet conditions alitsüla," ta pai ashir.

Ajisüaka Hezbollah-i tang tashi item tejangraba tejangja kecha angazüka mali, ta Qassem-i ashir.

Israeli Energy Minister Eli Cohen-i ashiba agi, rara anena atatsü asoshi kechi terms agütsütsü ta jembishinütsü atema security cabinet mentar.

"Jembishinü lir, aser aji mapang agitsü amai bilemer," ta taoba mapang intelligence minister inyaka alisang Cohen-i Israeli public radio dang ashir.

Anogo 60 asoshi rara anena atatsü atema Israel takhangba jembitsü atema Mongulbar aonung Ato Kilonser Benjamin Netanyahu-i minister tem den ajurutepa liasü. Yangji Hezbollah züngsem

tem Israel arütsü nungi kilometre 30 shi pilar Litani River north nungi ainshitsü aser arütsü nung Lebanese state army yoktsü dena lir.

Gaza aser Lebanon nung rara atemtsü asoshi terenlok mera agitsü atema Tir Joe Biden indang Middle East adviser Brett McGurk aser Hochstein na Bodhbarnü Israel-i ogo, ta US State Department ajanga ashir.

Kasa mapang Israel mitkari nüburtem dang ner yimti aser yimtsüing nung Hezbollah anema tashiyim amshitsü ta tekum dangtsü shir mapang tatsüka tsüingta Lebanon anüdoklen Baalbek yimti nung bomb apokba liasü.

Israel-i Baalbek region nung tesem ana amakdang nisung 19 tepset, ta Lebanon indang health ministry ajanga ashir.

Israel mitkari Baalbek aser Nabatiyeh nung Hezbollah indang "command and control centres" aser kiralongrar ki o jen amak ta ashir.

Ano Israel-i Bekka Valley anüdoklen Sohmor jila nung amakdang nisung 11 tepset aser 15 yiru, ta Lebanon indang health ministry ajanga ashir.

Kasa mapang Hezbollah-i Israel north tsütsü Haifa aser Acre densema military positions asem ung rockets aser drones khaloktsü ta ashir.

Mapang tatsüka lir parnokoi Tel Aviv southeast tsütsü military training camp ka nung rockets khaloktsü ta ashir.

Hamas bhukuma Hezbollah teloki arütsü alema Israel nung amak tenzükür küm ka jungnüa lir Lebanon nung taoba ita rara ya tenzük.

September 23 nungi tang tashinung Lebanon nung nisung 1,754 tepsetogo, ta health ministry ajanga ashir.

Israel mitkaria September 30 nungi Lebanon nung ground operations tenzükba sülen sepai 37 takum samaogo ta ashir.

11buba Kohima Open Volleyball Tournament final tanü asayatsü



Kohima, Mongputeni/October 31 (TYO): Kohima District Volleyball Association (KDVA) tawabangba kübok 11buba Kohima Open Volleyball Tournament 2024 (Men & Women) final November 1 nü Indira Gandhi Stadium, Kohima nung asayatsü.

Asayamung shibangba sentong nung OSD (Sports), Department of Youth Resources & Sports, Government of Nagaland aser taoba mapang international football asayar Roko Angami alakteta jaoker asütsü, koba November 1 nü 2:00 ako nungi tenzüka agitsü.

Asayamung tenzüker tananübuba Angami Sports Association tir Rokovikho

Chale-i match patron ama shilem agia liasü.

Brhostibarnü tebur quarter final asaya nung Senapati Sporting Club-i Kiruphema Youth Organisation-A akok aser Japfü Range Volleyball Club-i Küsoma Youth Society, Mima tsükdakja liasü.

Tanga quarter finala asaya nung Blind Spikers Akuluto VK-i, Bond of Brother Chesezu akok aser Kiruphema Youth Organisation- B-i Michazou Jr. Mima madak takok ngua liasü.

Tetsür asaya nung Senapati Sporting Club-i, NAYSA-D akok aser Shürho Mountain Club Kigwema-i Team Ace, Kohima madak takok ngua liasü.

Maneni MADFA Club Dimapur-i, NAYSA-D akok aser asaya pezübuba nung Senapati Sporting Club-i Shürho Mountain Club, Kigwema koka liasü.

Tanü tetsür asaya pongububa nung MADFA Club Dimapur-i Team Ace, Kohima madak takok ngua liasü.

November 1 nü asayatem (9: 30 nungi)

Tebur Semi Final

1. Senapati Sporting Club vs Blind Spikers Akuluto VK
2. Japfü Range Volleyball Club vs Kiruphema Youth Organization-B

Tetsür Final:

Senapati Sporting Club vs MADFA Club Dimapur.

India den T20 asayamung atema South Africa team sangdongogo

Mongputeni/October 31, 2024 (Agencies): India den taruba T20I asayamung atema Cricket South Africa-i asayar 16 sangdongoba nung Gerald Coetzee aser Marco Jansen nata densema lir.

Iba asayamung atema asayatem Bresthostibarnü sangdongogo, koba November 8 nungi tenzüka 15 nü tashi asayatsü lir. Asayamung nung asaya pezü asayatsü.

Yirur aliba tanepsü anguba sülen team nung asayar tejen Heinrich Klaasen, Keshav Maharaj, aser David Miller nung ajak züngoksemogo.

Selection committee-i arishi küm 24 tain asayar Mhllali Mpongwana nem tang mezüngbuba international jenjang nung asayatsü atema maongka agütsüogo. CSA T20 Challenge asayaba mapang pai 14.08 average nung wicket 12 agiba sülen pa team nung züngoksema liasü.

South Africa-i, iba T20 asayamung atema Kagiso Rabada aser Lungi Ngidi na nem anisüngzük agütsütsü telemteba agiogo, kechiyong parnok November ita tatemlen ano Sri Lanka den Test ana

asayatsü lir.

India den asayamung ya Durban nung November 8 nü tenzüksü aser iba sülen Port Elizabeth nung November 10 nü tanabuba asaya asayatsü. Maneni November 13 nü Pretoria nung tasembuba asaya aser Johannesburg nung November 15 nü tatembangbuba asaya asayatsü.

“Iba asayamung ya onok atema kanga jangrademtsü aser tongibang asayamung ka lir, kechiyong onok 2026 T20 World Cup atema maneni team yangluba mapang ka lir. Team nung lanur aser asayar tejentem meyoktepa lir aser India team den parnoki junga asayatetsü imla atar,” ta coach Ron Walter-i ashi.

Squad:

Aiden Markram (captain), Ottneil Baartman, Gerald Coetzee, Donovan Ferreira, Reeza Hendricks, Marco Jansen, Heinrich Klaasen, Patrick Kruger, Keshav Maharaj, David Miller, Mhllali Mpongwana, Nqaba Peter, Ryan Rickelton, Andile Simelane, Lutho Sipamla, Tristan Stubbs.

Australia coach McDonald indang contract atsülangtsüogo



Mongputeni/October 31, 2024 (Agencies): Border Gavaskar Trophy asayatsü lia Australia-i cricket team head coach Andrew McDonald den ano küm asem atema tenangzüktepba yangluogo, ta Cricket Australia-i Bodhbarnü metetdaksü. Pa 2027 küm tatem tashi inyaksü.

Justin Langer-i coach mapa toktsüba sülen McDonald-i 2022 küm tetenzüklen coach mapa agizük aser pa lenisüba nung Australia team-i mezüngbuba ICC World Test Championship akokba den 2023 küm ODI World Cup

trokbuba kokogo.

McDonald lenisüba nungsa taoba küm England nung oa Ashes asayamung drawn asüba sülen parnoki Ashes meyipa bener aruogo aser parnok tang Test rankings nung temaba jenjang nung lir. ODI aser T20I asaya nunga parnok India sülen tanabuba jenjang nung lir.

“Ni kanga tia ka-a lenir, asayar, coach aser staff tem telok tajung ka den inyaker, shirnok iba telok terenlok aser takok asoshi bendanga agütsür lir,” ta McDonald-i ashi.

“Külem coach tem aser

staff tem professionalism, tajangshiba aser bendanga agütsür aliba ajanga takok ngua arudar aser iba den kasa tongtibangsa telungjem adokogo aser kati ka dang temulung lemteta kümogo.

“International cricket asaya nung team ajak asoshi tetsükdaksü aika lir aser iba telok, asayar aser staff temi format ajak nung külemi item tetsükdaksütem ajangeta aruba atema ni kanga nema adanger,” ta paisa shisem.

McDonald shiba tang India den Tests asaya pongu atema pai aniba team renemshitsüba mapang ka lir, pa lenisüba nungsa Australia team linük nung 2025-26 season nung Ashes series asayatsü.

McDonald asoshi tanga tongtibang asayamungtem rongnung India nung 2027 BGT tour, 2027 küm South Africa nung ODI World Cup aser England den Melbourne nung 150buba anniversary Test asaya asayatsüba densema lir.

“Andrew ya coach kanga tajung ka lir aser pai Australia tebur team coach mapa maneni abentsü atema tenangzüktepba yanglushiba asoshi onok kanga pelar,” ta Cricket Australia indang national team tem Executive General Manager Ben Oliver-i ashi.

Tzümetsüng ajanga Madrid aser Valencia na asaya thinentüsü akok

Mongputeni/October 31, 2024 (Agencies): LaLiga aser Spanish FA (RFEF) nati hopta tatemi Valencia nung asayatsü aliba asayatem ajak thinentüsü atema temepishiba ka agütsüogo, kong Real Madrid aser Valencia na Honibarnü asayatsü aliba densema lir.

Küm ter tsüngda linük anütoklen tzümetsüng tamajungtiba agi kongshia nisung 95 tashi taküm samaba sülen asayatem thinentüsü temepishiba agüja liasü.

Bresthostibarnü RFEF Competition Committee-i telemteba magi aliba mapang ka nung, LaLiga nung Villarreal aser Rayo Vallecano na asaya aser second division nung asaya asem tashi thinentüsü imlar.

RFEF-i, Valencia, Getafe aser Real Sociedad amala LaLiga club tem densema hopta tom nung asayatsü aliba Copa del Rey asaya trok thinentüsügo.

“RFEF-i LaLiga aser club temi temepishiba agütsüba sülen First Division asayamung tenzüker anogo 12buba aser Second Division tenzüker anogo 13 nübuba hopta tatemi Valencian Community nung asayatsü aliba asayatem

thinentüsügo,” ta RFEF sangdong ka ajanga metetdaksü.

Real Madrid aser Barcelona densema LaLiga club temi Valencia, Albacete aser Andalusia temeket nung tzümetsüng lendong nung asürtem den asükhulemsatepogo.

LaLiga-isa, Bodhbarnü sangdong ka ajanga ashiba agi, taruba round ana asayaba mapang asaya ajak nung asürtem nem aküm tetushi agütsüba mapang agitsü.

Kasa mapang nung Valencia-i, chiyongtsü aser tanga tenüngdakba oset balala tenla agütsüba toktsütsü atema parnok indang stadium amshitsü asoshi temelaba agüja liasü. Tzümetsüng agi kongshir alirtem nem teyari agütsütsü atema club aser Valencia Food Bank na longjemer inyakkdar.

Maneni tzünglu aruba ajanga motor sports daka kongshia Ricardo Tormo Circuit nung Formula E testing daka kongshio. Ricardo Tormo Circuit nung ya hopta ana tsüngda MotoGP season final race ayongzüka asayatsü renema lir.

BIEMDANGANG

“Tenungdakba aser taginuba na bendangang.”